

光緒山西通志

鄉賢錄二十 錄二之二十 山西通志弟百三十五

賜進士出身頭品頂戴兵部侍郎兼都察院右副都御史巡撫山西提督軍務臣張爾巽

旨監修

國朝 乾隆各州屬 嘉慶至咸豐

吳嘉炎字亨仲一字靜夫沁州人文端公曾孫進士正之子也生而凝重不事嬉遊授經書一過成誦乾隆壬申舉人庚辰由明通成進士家居十年選授廣東普甯知縣普甯鄰接三陽繁劇難治前令以降調去案牘塵積下車悉剖決之民某殺人投廁滅迹遠遁株連鄰里頌繫累月至是捕得治如律無辜得釋地瘠賦重逋負為常又多盜賊嘉炎力革浮收苛派行保甲法設練總都長互相稽察用是民皆輸將恐後奸宄屏迹揭陽民馬阿九糾眾結盟縣人張振旭陳阿皆陰

相通嘉炎訪得之解赴揭陽備質其令某弗受乃以情密白
總督會總督亦微聞案驗得實將按籍捕治以邪教論起大
獄嘉炎力爭以爲鄉愚被惑無他意祇治爲首者數人全活
以千計以最薦升儋州知州去之日士民追送至境如失慈
母道出揭陽凡罹前案者亦攜婦子歡迎焚香頂祝者相錯
於途謂非使君無以有今日也在儋詰奸剔蠹力除夙弊而
於黎人尤撫治有方黎有二種伏處山谷峒長皆吏胥爲之
及奸商流棍冒差需索黎人隱忍受制憤極則以死報之往
往橫相殺戮焚燒村墟動輒盈萬嘉炎洞悉其情親入山峒
問其疾苦諭以威德擇役中謹愿者爲之長嚴禁侵陵諸黎
皆感泣奉命終嘉炎任帖服無失事孔廟歲久頽敝捐俸修
之葺東坡書院延黃進士河清主講席集諸生優其月餼暇

則親詣院中相與講論來學者至座不能容舊例僑戶悉免徭役故俗以應試爲榮童卷至數千而距京師且萬里得一第者艱於上達乃倡捐多金儲爲經費遇公車北上以歲息贈之自是科名聯翩而起文風爲海南最地屬煙瘴例五年得遷厯俸將滿以劬勞感羸疾詳請解任調理僭民間之相與攀留旣不能得則刊石頌德走送者至數萬人有泣下者家居敦睦任恤內行純備宦橐蕭然僅足自給坐臥小齋時手一編爲娛卒年六十有二子沆嘉慶乙丑進士慶元知縣裴元長字體仁沁州人生有至性母沒哀毀幾殆舉壬申鄉試庚辰公車北上聞父疾卽日歸沁距都千五百里以七晝夜馳抵家父爲進一餐及治喪祭葬悉遵古禮識者遽之以大挑補朔州訓導薦擢崑山縣知縣賦重訟繁素稱難治而

漕米七萬石自丞倅吏役及士民之豪猾者莫不視爲利藪元長律已以廉革冗費禁浮收嚴科條凡包攬指抑之弊舉無所容尤加意貧民攜升斗來者立登倉庾於是頌聲大作輸將恐後十餘日而漕政告竣邑父老謂數十年來所未有也上官至札飭州縣爲法折獄一以誠信爲本不輕用刑而研鞠之下情無或遁縣與新陽同城鄉民糾眾抗租差役至執而撻之新陽令將具文上申元長曰如此則大案興矣與婉商檄崑山役往甫至民相謂曰此老縣太爺差役也必不使我輩喫苦遂相率聽命事乃得解丙午戊申兩充江南同考官所取皆知名士如解元季純大等二十餘人未幾調署常熟既視事廉得衙蠹之爲民害者杖革殆盡惡衿流棍黜而屏迹邑多貴族禮接其賢者以示矜式於不肖者則有犯

必懲絕陋規嚴漕弊一如宰崑時以年踰七十請致仕巡道汪志伊素勵風節於其歸以詩贈別且曰江東少一賢宰志伊去一賢友矣兩邑士民攀送者百餘里不絕旣歸囊橐蕭然與爲校官時無異也自幼博極羣書尤熟史事每論古今人物得失成敗瞭如指掌爲文古茂磅礴蔚爲時宗而內行純摯踐履篤實恥以文人自命嘗曰人須立定腳根方可做得人成得事年八十一卒

魏惟五字爵菴沁州人乾隆壬申魁於鄉由大挑借補商州州同旋署鎮安知縣實授神木所至以廉潔稱鎮安在萬山中地多客民倚巖麓爲離落相保聚獷悍爲土人患惟五爲設教條久之畛域悉化民俗大和有遊僧以邪教越訴大吏羅織數千家將起大獄察其誣力爭之事得未減鎮安人德

之神木北鄰蒙古宿重兵遊民四集稱難治惟五處以鎮靜
因俗爲治夷漢相安軍民無擾縣向食蒙鹽無課額當事者
徇商人請議與河東引地均輸稅令旣下他邑皆招商設局
譏私販藉以漁利惟五屹不動未幾大吏察知病民事不果
行癸卯歲大禋奉

旨賑濟惟五時已感疾猶親歷山谷清查災戶散給銀封擇
士人分任其事勸富民遍貸鄉里其老弱不能存活者則別
捐廉購米煮糜收養之以勞瘁疾日劇請解任未及歸卒士
民爭致賻昇歸其櫬子鸞朝亦中式己亥鄉試第二

寶璜字文貽平定州人初習儒業屹屹窮經適族父某以武
科起家遂棄章句就材官選乾隆壬戌聯捷進士由侍衛授
江西鉛山營都司歷遷至廣東提督深沈廉正有遠略任鉛

山時有渡船劫掠客貨乃派兵僞作茶商已潛隨之至河口
果遇劫力擒其魁並夥黨無一幸脫者河路一清參戎泉州
獲著名巨匪江標及教匪黃權巡撫爲奏聞得優獎自是爲
高宗所知授紹興協副將兩護處州鎮所在奸宄斂迹一時有
全越福星之頌鎮登州訓練水師得善泗者超擢之厚給月
餼令率其伍別爲一隊學成稱絕藝時有請瑣者

上遣人密偵之使還以實具奏

上曰國家得一將材矣遷貴州提督金川之役赴蜀助剿屢立
戰功調湖廣再調雲南常德饑民滋事諭解之而捐米速賑
人獲安堵鶴慶四面高山城如釜底水潦時至民無安枕派
兵尋批山根淤塞洞口自是患永除及官粵海嚴巡防革陋
規洋盜潛蹤市舶腐至英吉利貢使抵粵奏明彈壓事

諭旨嘉其得體以年老自陳

予告回籍前後入覲疊承

恩賚嘉慶元年

授受禮成再預千叟宴拜受

御製詩刻及如意壽杖朝珠文綺之

賜辛酉重宴鷹揚壬戌重與會武宴

殊恩曠典一時稱爲人瑞及福將云家居端坐學易訓課子
孫不預外事月朔必公服北向稽首其恪謹如此卒年八十

八

張宗文字慕西平定州人由舉人慙知鄰水涓源諸縣遷湖
南永甯府同知生有至性童時父偶嬰疾籲神祈代母喪廬
墓三年與弟友愛備至終身未嘗有違言居官明練吏事尤

善折獄鄰水民甲與乙比鄰而居素有隙甲子入山伐薪受傷死乙田中訟乙讐殺乙力稱冤甲持之堅而實無左證也宗文檢尸有掌傷乃令甲乙各手按尸而甲之五指適與傷合嚴訊果自殺其子而誣陷也一時頌以爲神所厯縣並多治績好學至老不倦工制舉文士林奉爲楷式焉卒祀鄉賢張佩芳字蓀圃一字卜山少貧嘗燕糶稽以照讀年十五以背誦諸經入學領乾隆丙子鄉薦丁丑成進士初爲歙縣令新學宮建書院立社倉修志乘懲奸慝毀淫詞折疑獄恤窮民邑人作爲八政頌擢知壽州俗强悍佩芳至釐奸剔弊洞悉隱微豪右皆懼伏重修循理書院建裕備倉調泗州下車免重稅以恤商困豁浮糧以除民累州當泗濱淮湖黃交相爲害佩芳詳悉源委條陳利害當事倚重之民向惟種稻薄

水旱卽災乃相土宜廣樹藝以裕民食其後州屬及鳳陽皆
倣行民利賴焉學問淵博時以經術爲吏治好蓄書公餘之
暇丹黃不釋手精於考證所著有翰苑集注諸書及詩文集
趙宗文字漢章壽陽人甲午舉人由大挑歷署桂陽邵陽華
容新田知縣華容境連洞庭湖湖中大盜董舒勤久爲民患
擒得並其黨悉按誅舟行無虞補郵縣知縣下車課農桑教
樹畜捐俸增書院膏火倣朱子白鹿洞學規嚴立課程於是
士奮於學而農皆勸耕郵人惠之爲立祠焉會永綏苗叛官
軍南征奉檄督理驛站供億不以累民旋調赴鎮寧大營所
轄夫役多至八千人人露處多病乃出已貲結茅爲屋十人
一棚築牆鑿塹爲固與共飲食同甘苦恤之備至年餘無一
逃亡者嘉慶元年調赴辰州總局夫役遮道泣留如失慈母

明年以勞績加知州銜調補綏甯知縣地介苗疆民多頑梗宗文爲墾水田設義學利導有方務以德化久之風氣丕變職滿以最當遷卒於官方疾作民以爲大感爭奔禱於神及沒皆巷哭祀之崇甯書院宗文在郵作訓俗編在綏作詩竹編皆有裨於治教云

田興梅字子和孟縣人癸丑進士以知縣需次雲南署浪穹縣縣產秋筭雪梨屆時官輒封其園以備餽遺取足乃聽自售吏緣爲奸民苦之到官力弛其禁明年秋調同考官雨水漲溢滙縣前湖壞田廬無數撤闕歸急請興工躬督疏築並豁其賦大理守廉其能請於上官俾佐郡務遂攝同知事再署雲龍州民夷雜居兼有鹽井銅廠銀廠煩劇難治剔奸詰暴事至立決課亦隨集夷匪恆札紉滋事或言其妹爲滄浪

民婦與通謀執至鑒其在立釋之尋調姚州轉署河陽值歲
歉竭力賑恤民惠之膺卓薦以親老就近補河南內黃縣境
竇公河爲漕運孔道奸民時盜洩河水俟舟膠僱夫起陸挾
其黨索厚值或乘間攫客裝擠之於水攫而分之爭鬪殺傷
之案累累相積官不能制大吏患之與梅謁請先查河而後
到任易服密訪盡得其魁並吏役之與相通者旣受事悉置
於法一縣驚爲神明焉遭艱歸遂不復出卒祀鄉賢

崔映辰字斗南忻州人乾隆戊戌進士歷知新泰蘭山陽穀
日照諸縣廉明慈惠所至有聲會德平以漕務激變戕官委
員亦被殺嬰城固守人情洵洵大吏甚怒議以兵剿映辰請
撫之攜一僕單騎往諭德平民夙耳映辰名相戒毋犯因責
以大義皆感泣羅拜延入署坐堂皇錄首罪七人餘皆釋不

問事聞

召見

溫語褒嘉超擢泰安府知府遷濟東泰武臨道署按察使映辰益勤於職遇事持正不少瞻徇卒以此與巡撫忤被劾

上重惜其才降曹州府知府方駿駿進用而以在河工積勞嘔血未幾遭憂歸遂卒聞者咸惜之以爲未盡其用云映辰少負異才文章雄駿與父嶸並爲後學所宗稱爲西山先生有文集行世

鞏懿修字恭甫定襄人七歲能文淹貫百家執親喪哀毀幾至滅性事兄備極愛敬究心理學嚴義利之辨由癸丑進士授臨安知縣興利除害邑中肅然浙撫以誠實幹練有守有爲調繁烏程士知學道民德善政嘉慶辛酉內擢主事辭歸

日西通志卷一百三十五 雜錄第二十一
七
著有圖南卜易晉昌事類諸書及文集

馮廷丞字均弼乾隆壬申舉人以蔭補光祿寺署正轉大理寺丞累遷至刑部郎中在都與大興朱學士筠歛縣程編修晉芳諸名宿往來論學以名節相矜尙久官法司治獄以平恕稱嘗曰獄者愈求則愈深要在適中而止則情法兩得時以爲名言出爲甯紹臺兵備道調臺灣道勤於其職遇屬吏以禮有餽遺者卻之遷江西按察使治獄如爲部郎時王錫侯字貫獄起以失察落職論戍捐贖以道員留江南用補江甯道再擢湖北按察使卒廷丞通史學精地理性喜接引尤急貧弱盡心民事雖一日必舉其職既蹶復起清操彌勵時論以其好施而無所取清而不刻篤學勤政未嘗近名謂之三反及卒士大夫莫不痛惜焉

馮履豐字一蜚鄉賢鍾宿子也以舉人授舒城知縣歷署定遠縣及廣德州所至有循績調知歙縣歙爲淮南名邑世家巨族相望有以公事來者必詳詢地方利弊虛己公聽語不及私亦竟無以私干者性簡默自奉淡泊昆季敦睦終身無間初鍾宿生五子皆負才名乾隆壬申履成履泰同舉順天鄉試履成又偕弟履謙先後成進士未幾其仲履豫亦舉於鄉獨履豐累試不遇則益自奮厲下帷攻苦矻矻不休戊子秋遂以禮經中式鄉人榮之起五桂坊紀其盛子景嶠亦舉人官渾源州學正

郎若伊字任之少讀書若夙誦一過輒不忘未冠以默十三經補州學生舉庚寅順天鄉試明年成進士除刑部主事累遷郎中轉御史出爲直隸按察使踰年卒在部屢決疑獄甚

爲上官倚重遇部中大臣奉使讞獄四方必奏請以從

上習知其勤慎擢御史未十日卽拜直隸按察之命及卒

上親書奏牘曰可惜蓋將大用之也性通敏於律意吏治皆所洞悉制行廉潔而一持以仁恕未嘗自表襮工詩成輒棄之亦不以示人嘗遊滇之雲濤寺興耐徧墨其壁因自號醒石云

崔五峰字瞻岳父映淮進士官河東教授五峰與兄特峰同舉辛卯鄉試大挑以知縣用嘉慶初補略陽縣時教匪蔓延川陝縣當其衝五峰存卹難民團練義勇籌守禦策甚具三年賊竄入境以有備得全經略才之調赴穆提督營主糧運一日賊大至提督分軍出禦突有悍賊乘間劫營矛及五峰身旣審知爲略陽令則相戒勿犯好官竟舍之去以勞遷知

甯羌州居二年引疾歸性淡於榮利在陝與軍務相終始歷
署雒南乾州所在招流亡築塞堡供億悉豫爲籌咄嗟立辦
民感其惠而忘其勞蕩平之日當事方需用遽以疾辭

徐潤第字德夫五臺人學者稱廣軒先生性穎異眸子有清
氣射人幼能文王制軍秉韜時令五臺好講學從之遊業大
進乾隆戊申舉於鄉乙卯成進士授內閣中書補舍人轉典
籍俸直之外閉戶讀書不履津要之門嘉慶戊辰充儲濟倉
監督履任卅月積弊釐剔一清次年卽有梭米霉變之案各
倉監督皆革職分賠儲濟米獨乾潔旣而通州中西兩倉白
米案發官吏以侵虧伏法倉場檄潤第兼署中倉事三日之
內條上七事皆中窾會侍郎戴聯奎以爲能奏調海運倉引
疾歸尋起補原官出爲施南府同知同知駐利川縣履任閱

卯簿胥役逾八百人訝曰何多也詢之則大半游手無籍掛名充役羅織殷戶峻人捏控得賄則上下分肥潤第慨然曰畜虎狼數百而啖其搏噬之餘是盜賊也何以官爲擇留愿樸者數十餘悉汰去架控者重懲之條教簡重風聲肅然郡守南豐譚光祥請於督撫調郡審積案潤第剖決如流不數月結控案三百餘施南三面鄰四川川匪名紅錢客時結隊入境剽掠潤第與光祥商定方略倣古守望相助法頒之民間鄉擇社長一人授以防捕機宜盜來輒失利遂裹足不敢入以疾乞歸授徒自給道光中卒潤第性質剛毅有大節簡易通達不解沾名生平一介無苟取服官二十餘年衣不盈兩笥中書冷秩郡丞閒曹而所至必有樹立中歲卽潛心易學悟入元微先儒理學之書讀之殆遍旁涉二氏百家皆以

易象折衷生平未嘗專著書門人有質疑者隨問條答或讀書有得隨手劄記子繼畚耒集爲敦良齋遺書梓行

馮郁代州人以蔭選授奉天府經歷改知縣歷宰河南閩鄉貴州獲安遷知永豐州蜀中蓄有蝸匪蔓延黔疆獲安民時羅其害郁至集丁壯時教練之厚其犒賞久之技皆精蝸匪至卽被擒終郁任無敢窺獲安永豐民苗雜處轄土司六十四亭故事官府日用皆於亭取給蠻獠畜之或峻法示威郁慨然曰均赤子也奚民苗分爲一撫以恩信悉除其苛派性廉介不妄取一錢後權思州府卒貧無以斂同官賻之歸妻子至不能給朝夕云

任秉哲字西園河曲人爲諸生時家赤貧勵志讀書備嘗艱苦乾隆辛未成進士任朔平府教授朔平爲邊郡廟學在威

遠堡地極瘠苦秉哲淡泊自甘與爲諸生時無異遇士樂爲講授春風和氣士多親之造就者日益眾駐堡千總某同官也亦執弟子禮甚恭以繼母年高乞養歸卒祀鄉賢

葛德溥字湛恩安邑人負才略識政體入仕歷武定府同知職司鹽糧力革陋規釐剔積弊漕米向由歲暮交官民以守候爲苦請改春兌費省而民稱便署東平州屬邑諱水災饑黎垂斃查明以實報免糧加賑全活無算調守兗州會徐河決當事派令協濟梳稽百萬勛力懇豁免民不擾累嗣擢知袁州府修文廟釋冤獄事至隨決合郡悅服所屬萍鄉獲逃犯擬斬溥授自首例請減奏聞遂著爲令萬載屯田加糧多至十四倍請減十之三並除水衝沙地諸賦窮黎咸頌之薦升贛南道廉知廬陵萍溪等處奸滑攬利累商地痞藉差濫

派皆勒碑示禁永革夙弊卒祀江西名宦

葛鳴陽安邑人由副貢授監察御史巡視中城官至吏科給事中爲人慷慨負氣節文章行誼爲一時推重周貧濟急見義勇爲隆冬設粥廠散寒衣道旁置土屋設火具以棲流丐鄉里無凍餒苦值歲饑買粟四百餘石散賑全活甚多他若掩骼斲施棺槨立茶亭散藥餌諸義舉時時爲之又經畫久遠俾後人踵行不廢縣有大役必躬程其事而介灘坡設廠車十餘處且惠及行旅城垣圯獨力修築興工十餘年乃畢迄今屹然爲保障嘗校刊宋張有復古篇自著有宗約歌會樂軒藁保生衍慶幼幼心裁諸書行世

王宓安邑人由拔貢舉順天庚辰鄉試明年成進士授江西永甯知縣與王千分校在縣闢書院設義倉地素不種麥宓

上世通元卷一百三十五 別置錄二
察其宜給籽種得大熟由是遂廣植爲農夫利甯民惠之立
祠以祀調星子加意文學擇士之才者延師講授刊鹿洞書
院課藝一時稱盛憂歸起補甘肅古浪令委修甯夏河度勢
疏濬甚爲當事倚重金川用兵調任灌縣水陸交衝宓架橋
平路飛輓便捷軍需至叱咄而辦於役夫體恤尤周役者歌
曰居有積倉行有裹糧我侯之德民不能忘以軍功升涪州
知州再擢邛州並署成都府同知卒子鳳起庚子舉人

王調元字叶宮解州人丁酉魁於鄉授甌甯知縣學問精深
能以經術飾吏治甌甯素有虎患及下車虎頓渺然邑人神
之號曰神君署浦城亦多德政及去百姓立祠祀之著有易
圖洛書解禹貢九州考諸書

王澤臨垣曲人乾隆甲戌明通進士授永濟教諭以薦擢高

密知縣調繁掖縣密人思其治績建祠祀焉在掖遇水潦疏決注海蝗入境率吏民力捕掘阬驅瘞之竟不爲災大吏以循良旌之值歲稔麥秀兩歧士夫競爲詩歌以頌遷萊州府同知以病乞歸年七十八卒

黃洽字融之一字鏡堂絳州人由王子翰林知湖南衡州府署衡永郴桂道其初之衡也僕從二三人隨帶小箱一具或訝之曰豪侈者必貪吾以清其源也嘉慶庚午秋闈監試內簾闕防嚴密積弊一清時有副考官家丁干求不遂乘間行刺傷其臂不稍動試竣奏聞置諸法由是直聲益著官衡五年潔己率屬力裁一切陋規修復石鼓書院及青草橋士民戴之沒後輿觀旋里泣送者自衡抵長沙不絕於道

右乾隆年各州屬

康紹鏞字縛南興縣人嘉慶己未進士授兵部主事補軍機章京在直十年由部員洊階京卿出爲安徽布政使擢安徽巡撫調廣東廣西終於湖南巡撫所在賑歲款實庫儲興利除害民懷其德

上嘉其功當

宣宗御極之初有言官吏陋規宜改爲公款者下行省議紹鏞方撫粵東會督臣查辦合疏開陳利弊切中時機湘楚中界洞庭周圍八百餘里汊港演漾四溢爲盜藪沿湖州縣輒以地界不明彼此推諉捕治不力紹鏞詳考輿圖按道里定營汛分限界址檄員弁依限巡徼其湖中漁船悉仿保甲例編審籍記停泊有定用是盜無所容商旅宴然不知風濤之警資性精敏博涉載籍嫻於掌故嘗受學於桐城姚鼐又從侍

世父基田習其治行故文章經濟蔚爲時稱家居建書院創宗祠購置書籍以爲宗族子弟及鄉人習讀之用至今賴之武新安字靜圃文水人嘉慶庚申舉人選授浙江新城縣知縣勸課農桑振新學校調署鄞縣縣爲海疆衝要新安蒞一載能聲大著適德清報災檄委振濟勞瘁成疾卒新城鄞縣之人皆感其清正建祠祀之

溫宜銳字可亭清源人乙丑進士知湖北咸甯縣清廉仁惠有古循吏風邑素稱文藪爲請於大吏廣其學額復建書院優加月餼士民感德勒石廟學以頌焉罷官後僑居鄂渚百姓時饋薪米禁之弗能止去之日號泣走送者不絕於道云著有詩文集

牛健亭字仁山徐溝人幼有神童之目年十二補弟子員嘉

慶己卯舉於鄉由大挑知浙江績谿縣地瘠民貧人無恆業
繼亭相其土宜導以蠶桑之利不數年成沃土以卓薦當遷
會海疆不靖烽火時警晝夜巡防積勞成疾卒於官宦囊蕭
索至無以爲斂云

劉寶第字松坪洪洞人嘉慶丙辰以諸生舉孝廉方正効力
河工借補潞縣管河州判委修安州隄防尋署州事捐貲拯
救災黎發倉振濟饑民先後全活甚眾擢楊村通判署宣化
大名保定諸府同知永平宣化知府所在以廉能著績嘗查
辦宣化天主教事開誠諭導咸感泣歸正鉅鹿妖人惑眾事
發奉檄往治按問如律良民一無株累尋攝冀州事值荒旱
開倉振卹人沾實惠王申補天津府同知會滑縣教匪之亂
襄辦糧臺軍資百萬咄嗟而理事平擢署大名府兵燹之餘

土匪乘間滋擾協鎮將擒首惡數十人置于法府境肅然乃
修復天雄書院聚文士相與講習年餘治績著聞

召見褒獎有加特授天津道以素習河務會堵築清河漫口
親率兵弁晝夜搶修河工習尙浮靡嚴飭屬吏盡裁革之廚
傳悉自備工竣無秋毫擾升廣東按察使調雲南尋署布政
使並有聲稱以疾去官卒于家

彭作邦字對山臨汾人嘉慶庚午舉於鄉甲戌成進士授內
閣中書遷宗人府主事道光中歷典貴州四川鄉試與王辰
順天分校艱歸遂不出爲人孝友端方湛深經術居京師二
十年供職外惟以著述爲事屢掌文衡皆稱得人歸後主講
晉陽書院令生徒兼習經史日與講論一時以實學相勸風
氣爲變所著有周易史證易傳偶解諸書詩文集行世卒祀

鄉賢

山西通志卷一百三十五 列傳第二

十四

尋步月字雲階榮河人嘉慶癸未進士授戶部主事清慎奉公甚爲曹文正公所器重捐納房爲戶部優差尙書某欲以步月派充力辭之其後假照案發在事者皆望巖議獨獲免人以此服其先見歷居諫垣剴切指陳念漕運鹽政尤爲國計民生所關係陳利弊反覆數千言皆見施行出爲福建鹽法道閩嶮自僉商後至是疲敝日甚步月至請於當事先清積欠核得正溢兩課帑本及息共銀一百八十餘萬兩分別請豁請減商免賠累自是課充力裕富商某以重貲祈免僉嚴拒弗許商復挾巨紳及大府書關說步月得書將具牘直揭商懼乃帖然時服其公莆田監生某於閩清地僞報盜劫護撫某庇之驟令劉家達以諱盜被劾矣步月時構臬力爭

總督檄司覆訊研審四十餘晝夜盡得其欺罔狀乃治某如律而復令職輿論稱快性廉介歷官中外除養廉外不苟取家居布衣疏食不異寒素而見義勇爲設宗祠祭田并增置書院學田丙午歲饑出粟振濟全活甚眾卒祀鄉賢

郭承恩字捷三潞城平順鄉人父峻崧貢有子八人承恩其六也以拔貢舉嘉慶甲子鄉試明年成進士入翰林改吏部主事累遷郎中在部十年供職清慎及掌銓政謝苞苴拒請託書吏無敢夤緣爲奸選人羣服其公那文毅公時爲尙書甚倚重焉道光元年出爲甯國府知府署安慶調撫州歷安徽甯池太廣道擢廣東按察使

陛見仍以道員用未出都卒年六十一其守甯國也值大疫捐俸購藥普施通郡鄉俗生女多不舉設育嬰堂親定章程

全活皆無算及爲監司江水泛溢頻年爲災拯溺起饑尤極
勞瘁喜營建甯國之惠濟橋撫州之文昌社皆廢圯力修復
之平順自改鄉後廟學曰以就蕪寄金里社次第興工規制
增壯焉天性孝友與兄弟白首無芥嫌爲學一本宋儒而於
名物度數必求詳核嘗校刊宛陵杜氏四書圖考行世卒祀
鄉賢

靳第選字位五長治人以諸生議敘主簿兩與鄉飲賓筵爲
人內行修飭善處鄉黨義漿仁粟沾溉甚眾暇則從事丹雘
著有家禮祭略日纂集順事集耐軒詩文集若干卷嘉慶末
入祀鄉賢常煜選潞詩稱其天性誠樸爲學雅尙躬行有古
君子風

常煜字經垣長治人嘉慶庚申舉人由大挑署廣西平樂知

縣大吏徵委決獄多所平反深倚賴之未幾歸集同人以詩唱和風氣翕然尤汲汲於獎拔後進矧恤寒素著有禮學宗傳桂林紀遊及詩文集潞安詩鈔道光中祀鄉賢

祁墳字竹軒高平人嘉慶丙辰進士官刑部主事累擢郎中屢借

欽使平反大獄出爲河南糧道擢浙江按察使時德清徐倪氏之獄久未決前臬司王惟詢至自裁墳至廉其冤昭雪之內遷刑部侍郎復擢廣西巡撫適江華獠叛蒼梧諸獠應之墳廣設方略分別剿撫而命將追擊其魁於芳林渡獲之事平

賜太子少保銜疏陳善後六策曰重官守以資治理曰選獠目以定賞罰曰禁游棍以安生業曰收火器以嚴禁令曰勤

訪察以別情偽曰興義塾以化氣質

詔卽施行移撫廣東奏修海墘圍田築虎門礮臺復

召為刑部尚書英夷之役以填習粵事

命督兩粵當是時夷船已陷虎門毀沙角逼廣州勢張甚其

酋義律擾及三元里民奮起與戰殲其師數百頃知粵民之

可用也檄沿海諸邑結為團夷人憚焉自是不敢復窺粵和

約乃定頃以後患未艾復議設險獅子洋屯田虎門清外洋

之盜皆允行焉又以求才無法力陳科舉之弊請變通考選

略仿唐宋制科分為五目曰博通史籍曰精熟韜鈴曰製器

通算曰洞知陰陽占候曰熟諳輿圖情形議寢不行時論惜

之旋得疾卒於粵

賜祭葬予謚恭恪祀名宦官其子之銓之鏐

栗毓美字友梅渾源州人嘉慶六年以拔貢生官河南知縣
遇災年放稅賑穀以實惠民不以上官意爲損益遷光州知
州汝甯府知府徙開封歷河南糧儲道開歸陳許道遷湖北
按察使河南布政使道光十五年授東河總督毓美嘗宰武
陟黃沁隄馬營壩工皆親與其役及是益勤詢河兵及官之
久者以地勢水脈及前任行事之當否蓋北岸自武陟至封
邱二百餘里南岸自祥符下汛至陳留六十餘里皆地勢卑
下多串溝串溝者在隄河間其始但斷港積水而已久之溝
首受河又久之溝尾入河而串溝遂成支河於是以遠隄十
餘里之河變爲近隄之河而隄河相遠之處舊皆無工不儲
料者也於是以無工之處變爲至險之工故人不及覺覺且
不及防往往潰隄爲大患毓美乘小舟周歷南北時北岸原

武汛串溝受水已寬三百餘丈行四十餘里至陽武汛溝尾復入大河又合沁河及武陟滎澤諸灘水畢注隄下兩汛素無工故無稽石隄南北皆水不能取土築壩乃收買民輒於受衝處拋輒成壩四十餘晝夜成輒壩六十餘所壩甫成而風雨大至支河首尾皆決開數十丈而隄不傷由是知輒之可用又試之原陽越隄及攔黃壩與南岸之黑岡皆奏請減買稽石銀兼備輒價計千輒爲一方方價六兩是後每有工役碎石及稽埽用大減數年間省官銀百三十餘萬而工益堅有不便其事者持異議語頗

上聞毓美前後陳奏曰護隄之率用稽埽然埽能逐激水勢俯齧隄根又易朽腐至碎石坦坡惟鞏縣濟源產石較近而採運已艱河工失事多在無工處所千里長隄勢不能盡爲籌

備而河勢變遷不常衝非所防遂爲決口輒則沿河民黨終
歲燒造隨地取給不設事機且輒及碎石皆以方計而石多
嵌空輒則平實每方石五六千斤而輒重多三分之一一方
石價可購輒兩方而拋輒一方當石兩方之用其質滯於石
故入水不移堅於稽故久水不衝又土不能築壩水中輒則
能水中拋壩卽邊成坦坡亦能緩受急衝化險爲易或謂輒
可保將生未生之工不能用於已生之後然使將生者可保
卽別無可生之工昔衡工之決因灘陷埽不能施馬營壩之
決因補隄不能得碎石使知用埽不如拋輒收輒易於用石
則數千萬之官銀可省疏入

上知其忠實可任且綜畫周密卒皆允之

屢詔褒賞終其任五年河不爲患

本朝河臣自朱公之錫後若靳文襄張文端張清恪陳恪勤齊勤恪稽文敏張懋敬黎襄勤諸人皆有名績然修築率仍舊法易楛石以輒自毓美始非卓識精思身試而得其所以然之故不能創此法也二十年卒於位

上聞軫悼

贈太子太保

賜祭葬

予謚恭勤時長子烜已官刑部郎中乃

賜次子燿進士毓美在工勤其職有風雨危險必躬親之居平河曲折高下嚮背皆在其隱度每日水將抵某所急備之或以爲迂且勞費日能知費之爲省乃真能省費者也己而水至乃大服故十五年原陽之支河十八年盛張八尺之水

皆決口而有餘卒以無事或以爲天幸然未任之前三年祥符決及卒後二年南岸決明年又決則豈非人事哉當其令安陽武陟及守開封也恤疲忙懲得吏折疑獄如神時稱循吏而治河尤能通物性以盡利人以爲誠壹所格云旣卒吏民思之不置乃立廟以祀俗稱爲粟大王云

張清元字元卿渾源州人登嘉慶庚午鄉薦道光中以大挑知縣分發安徽歷署潛山定遠合肥鳳臺諸縣及壽亳二州補懷遠遷知宿州爲政廉惠所至興書院設義倉決疑獄除浮稅嚴剔蠹役勤恤民隱而尤長於治盜虜鳳等州俗習強悍會匪鹽梟視爲淵藪胥役多與通案發輒遠颺或拒捕官此者率姑息優容盜風愈熾清元覓線引信賞罰偵得巢穴立即掩獲先後擒巨盜以十數其中如吳兆豐姚紹先孔昭

秀王兩莒各犯皆奉

旨嚴緝者也皖撫程嘗奏獎爲通省緝捕勤能第一

召見褒諭有加咸豐元年奉

特旨佐辦粵西軍務三年周文忠公天爵督軍安徽以清元習皖事調以從時捻逆大股十餘萬據河南永城清元帶團勇由亳州協剿得賊謀斬以進賊設伏橋下官軍奪橋急擊斬其渠眾潰清元分兵三路乘勝前追賊目馬樂田等僞降而陰伏兵萬餘以待察其詐殺之賊猝失措復爲礮所衝相蹂躪赴水死餘黨殲除殆盡以功進知府銜

賞戴化翎嗣偕都統容照守宿州屢擒捻目張鳳鳴曹懷勛等逆首卜殿青尤驍悍數陷城邑屠戮甚慘淮人所謂卜黑小也據龍山之青曠倚險爲固清元攻破其寨黑小道追縛

之磔諸市時丁巳之秋天久旱其日得雨民歡聲如雷

特旨嘉獎擢升道員明年檄守浮山山在盱眙境縣互數百里爲淮上下游扼要地捻匪張落行覘清江姑蘇爲財賦藪艤舟淮岸將東下清元相形勢築礮臺屯軍山下扼其衝賊至督水陸軍夾擊挫其前鋒相持五晝夜會東北風起益發槍礮拋火器賊舟檣檝多摧毀知其將遁出奇兵要歸路俘斬以萬計賊卒不能過清江而東事聞

詔從優議敘浸大用矣疾作九年春卒於軍

賜祭葬贈太僕寺卿蔭子入監讀書清元性篤孝事母盡歡慷慨尙氣處師友間尤多風義而操守廉潔耿耿自信令晚時屢觸貴紳至遭誣陷終不少挫卒能以忠節勳名顯沒後

三年州人公請祀之鄉賢所著有賞心亭詩文集

以上大同府

張震字濼東一字乙山沁源人弱冠卽究心理學每讀程朱
之言必求有得於心而默體之由拔貢舉嘉慶甲子鄉試益
勵學行四方從遊者日眾道光初選授洪洞訓導母憂歸再
選復授洪洞教諭踰年以父老乞休年七十八部檄截取知
縣大吏爲陳請

賜大理寺評事銜又二年卒震事親能盡色養先意承志母
劉性好施修脯所入悉助之以博歡在官聞母疾不俟請徑
歸沁距洪二百餘里山徑脩阻一日而至年踰七十父猶健
在一堂五代融融然作孺子慕人羨爲奇遇以比唐詩人卽
爲其教人恪宗程朱以薛氏讀書錄爲先導而最工制舉文
循循善誘故士樂就之洪洞號文獻邦前後七年執經而來
者至齋舍不能容杜文正公督學時極相推重壽陽相其書

交也亦以純儒稱之卒祀鄉賢

黃璟字有春平定州人嘉慶丁卯舉於鄉大挑以知縣分發甘肅歷宰劇邑攝大州所至並著循聲嘗署鎮番修復書院創設義學洪洋川水舊資灌溉民爭利訟久不決璟按糧均水按水均時分塢分莊書之木板民服其平尋補隆德值歲饑設法振救民無流亡又捐俸購米五百石建義倉俾荒歉有備調山丹署涇州以廉能擢任皋蘭首邑煩劇措理裕加尋升安西州知州未至而卒性明敏嗜學博覽羣書尤工詩有集藏於家

祁寓藻字叔穎一字實甫祖文汪父韻士並別有傳寓藻幼穎異過目成誦父官戶部以銅案事牽連逮繫隨侍獄中益刻苦自勵年十八舉嘉慶庚午鄉試甲戌成進士選庶吉士

尋授編修

宣宗御極

命值南書房壬午分校會試旋典廣東鄉試皆稱得人癸未
視學湖南裁革新生紅卷陋規奏復童生覆試黎明入場之
例以杜流弊及科試凡向例卷費贄儀裁除殆盡湖人至今
德之丁酉以戶部侍郎視學江蘇疊奉

諭旨嚴禁鴉片撰新樂府三章刊示各處又重刊宋本說文
繫傳並朱子小學恭書

聖諭廣訓及

欽定黜異端以崇正學四言韻文重修常州試院文教一新
海防事起以左都御史奉

命偕侍郎黃爵滋巡視浙閩與吳文節公文鎔鄧制軍廷筠

籌備防軍經費及簡練水師將領各事宜夷艘犯廈門爲閩師擊退時庚子四月也未幾而浙之定海告陷使還至常州復奉入閩之

命乃泛海親履廈門周覽形勝歸而備陳夷情反覆和議不可恃狀

上是之

命入直軍機時某相方貴幸用事既力排林鄧諸人去之陰主款及事棘

上每臨朝而歎相退方從容言某園花盛開諸公盍過從觴詠爲歡駕藻眾詰之曰

上焦勞若是公爲大臣豈遊燕時耶相默然慚聞者壯之累遷戶部尚書己酉七月授協辦大學士時河東鹽務方改短商

而積弊愈甚商既賠累如故而富民更無安枕官吏勒報恣爲魚肉因之破產無算嚮藻奉使讞獄甘肅道經河東廉知其弊回京據實條奏明年遂有查辦之舉改爲官運由是三省商民得免其害尋拜體仁閣大學士仍管戶部咸豐間海內軍興久度支匱乏拮据籌畫以給軍餉不忍巧取累民議論與言利之臣多不合因而謗譏繁興賴

文宗素鑒其忠保全始終以病乞骸

詔慰留再疏得請以

予告大學士致仕

穆宗卽位

皇太后特旨起用以大學士銜補授禮部尙書在

宏德殿授

穆宗讀每有講說闡切悱惻出於至誠時方讀大學具疏反復
推明爲君止仁一語進呈朱子小學及陳宏謨大學衍義輯
要杜詔讀史要略等書又屢陳時務保薦賢才復疏陳弭盜
安民必須循吏請分別表彰錄用病中得句云病久豈忘憂
世念夢中還有薦賢心其生平心事於此概可見矣同治五
年卒年七十四

贈太保謚文端入祀賢良祠性篤孝母劉少時督讀甚嚴稍
拂意輒予杖旣官學士猶時受譴每值母怒長跪引咎伺悅
乃敢起身厯

四朝由侍從直樞廷受

宣宗知最深忠言讜論類皆造膝敷陳謹密不外洩雖子弟無
由聞知廉俸所餘輒以周戚族交遊清風儉德霍山以北言

家範者必首稱焉所著有履欲亭詩集馬首農言勤學齋筆記行於世書法爲一時最得者皆寶貴之子世長今官工部尙書

田嵩年字季高孟縣人鄉賢興梅子也少穎敏七歲能詩劬學媚古隨父宦遊滇南及歸徧歷江山學益大進黃勤敏公鉞督學山右極賞之以優貢充八旗官學教習留都供職卽館黃所黃以書畫擅名一時

仁宗嘗謂曰汝年過七旬亦有代筆者否卽以嵩年對蒙賜大緞一端士林榮之舉己卯鄉試旋成進士入翰林

宣宗卽位授編修尋

命南書房行走充戊子廣東正考官遭憂歸服闋補原官仍直南齋尋以大考第一授翰林院侍講學士充日講起居注

官擢奉天府丞兼學政職滿一巡順天府尹未幾卒嵩年以文學受

兩朝知遇明敏誠恪所在克舉其職嚮用方殷遽至不起身沒之日

上猶垂詢病狀及家事爲惋惜久之性喜宏獎接引後進孜孜不倦嘗主講晉陽書院課士以讀書立品爲先一時學者翕然宗之崇祀三立閣

馮清聘代州人諸生肇崧子也年甫冠舉於鄉登嘉慶戊辰進士入翰林授編修改江南道監察御史遷吏科給事中性慎密居言路五年兩巡漕務屢蒙

召對而每奏事畢卽削其草未嘗自表襮也道光初出知紹興府以廉勤稱嘗捐俸修屬邑育嬰堂蕭山西江塘鎮水菴

隄工爲浙東保障屢齧於潮爲展築七百餘丈民賴以無患
方以龍獄起研鞫盡得其情諸暨令某求庇弗得則撫他事
相脅清聘不爲動令竟論戍而爲烈婦陸氏李氏均請旌如
例時論快之平居儉約自奉與人無疾言厲色人以佛子稱
之及當官遇事則務存大體中所持斷如無媿阿態職再滿
卒於官

右嘉慶年十七人

喬松年字鶴儕徐溝人舉道光甲午順天鄉試明年成進士
授工部主事咸豐元年充湖南鄉試副考官累遷員外郎郎
中三年出爲松江府知府尋調蘇州府遭嗣父憂江督怡奏
留協理軍務五年官軍復上海敘功擢道員

賞花翎進監運使銜補常鎮通海道遭生父憂江督何復奏

留督辦糧餉當是時粵逆盤踞金陵沿江名城大半淪陷淮
北捻匪蠶起黃河改道北流漕運久梗淮鹽亦片引不行公
私埽地而松年自任監司凡行海運榷關稅諸事多屬創舉
區畫周詳用是大軍南征供億無缺當事倚之如左右手九
年遂以按察使銜補兩淮鹽運使專辦江北糧臺明年捻匪
竄擾清江率民團嚴備賊不得逞得

旨嘉獎河督庚長庸懦無能聞警退避再疏論劾得

旨逮問如律又奏陳江南招募之弊請兼調京兵綠營下統
兵大臣議行以籌餉功

予階二品尋設南北兩臺皆

命綜理同治二年起授江蘇布政使旋擢安徽巡撫三年捻
匪大入赴臨淮防剿賊竄英山復駐壽州十月督部將英翰

郭寶昌合剿破之追斬首逆陳得才馬融和先後降其眾十
二萬皖北肅清明年奏請增設安廬道分安慶廬州及滁和
二州隸之別置渦陽縣割蒙州亳州阜陽懷遠四邑地隸之
而移鳳臺縣治下蔡以便控扼於宿州之龍山駐遊擊以資
巡緝皆下部議行先是光祿寺少卿鄭錫瀛奏請於江淮屯
田養兵松年言授田抵餉以兵爲農其言甚美寶則難行因
極論兵民之不能相合古制之必不可復目前皖北但以開
墾爲急務田疇闕則賦稅登賦稅登則財用足財用足則軍
餉自出其中諸臣之所以言屯田者大抵慮將來勇丁無所
歸耳臣以爲寇平之後卽可以勇爲兵且略增其額所餘者
逐漸裁撤可無後患是歲四月僧親王戰沒曹州

上命曾國藩馳往督辦松年言會國藩久治軍旅氣量較遠於

前馳逐鞍馬難膺其勞蘇撫李鴻章英毅果敢其才識足爲
會國藩之亞而年力正強能耐勞任劇如以代會國藩督辦
山東軍務必能迅奏蕩平

上皆遷之其後淮軍卒殲平捻逆而散遣鄉勇亦皆如所料云
五年秋調陝西巡撫時關中回捻交鬪署撫劉勤吏事而短
於治軍松年至值捻首張總愚圍新豐解之已而戰於灞橋
賊大至全軍俱潰松年以陝軍之不堪用也劾署撫遣去而
檄舊部劉松山郭寶昌移湘淮軍授勦由是號令一新每戰
必克兵威大振會有奏言回民當招撫者松年以爲非撫不
能藏事非先勦不能施撫非籌給安插之地資生之費不能
善其撫若無震疊之威又無收養之力但空言撫之一字則
迄無成功徒爲陝人之恨回民者增以口實及左文襄公至

亦主用兵議相合六年冬捻逆被勦窮賊遁入北山謀東竄
時河冰甫結得勁旅夾勦可一戰而殲也而山西大吏奉
命督辦河防龍門以北從未親歷及賊窟宜川臬司陳某忽
自蒲東託故旋省賊遂踏冰渡陷吉州鄉甯擾及平絳已奉
旨褫職矣松年復劾陳某失機僨事貽誤地方於河防至急
之時致危局於不問僅予革職不足蔽辜旋按問得實遣戍
邊晉人快之明年以病解職尋起補倉場侍郎十年授河道
總督松年自釋褐以主事需次工部歷十四年始授實職觀
政多暇則日討故實稽案牘於黃運形勢疏堵之宜度支之
數莫不燦如燭照既受事卽疏言今日黃水泛濫運河淤塞
治之之法不外兩策一則堵河南之銅瓦廂俾其復歸清江
浦故道一則就黃水現到之處築隄束之俾不至於橫流由

利津入海於兩者之中權衡輕重又以就東境築隄東黃爲優考利津卽古千乘地正爲漢唐故道徐淮舊日河身半成平陸似關天意北宋時河忽南徙百計挽其北行而不能今旣北徙恐挽令南行而亦不能因詳陳形勢而以疏濬張秋築隄南北爲治黃運之關鍵

詔從之時議者爭欲分河入淮藉紓山東之患賴松年持之堅一意築隄東水東省尋慶安瀾其後鄭工大決全河南下朝廷卒絀浮議塞決口導河東行如故老謀碩畫動及久遠蓋身後猶彷彿見之以光緒元年卒

詔賜祭葬

予謚勤恪準臨淮壽州並建專祠子聯寶以主事用後官知府

潘毓瑞字錫五榮河人性沈毅淡泊寡營敦篤內行讀書刻苦自勵道光乙巳進士官江西署蓮花廳同知創築城郭聽民賴之尋知粵都值粵匪寇江右竄吉安擾及贛州毓瑞辦理團練剿撫兼施收復吉安泰和諸城咸豐丙辰奉委辦公道出粵都聞城陷愀然曰吾雖卸事久忍睹其民流離死亡而不力援遂檄各鄉團攻賊鄉民聞其至荷戈爭先賊旋遁當事偉其功奏擢知府並

賞戴花翎調知甯都州甫至賊已入境州素無備毓瑞激勵士民登陴固守賊攻圍二十八日卒得全尋遷河口鎮同知積勞成疾乞歸去之日民餽白水一缸以喻其清

張鎮南字儷卿孝義人由大理寺寺丞歷官至湖南寶慶府知府府毗連粵西搖民雜處稱難治鎮南謂變民風必先端

士習亟整飭書院敦請名儒捐廉俸優其月餽遇士以禮而於健訟武斷必嚴懲之猾吏蠶役皆聞風屏息尤善決獄每以一言定讞兩造皆輸服無異詞頌聲大作道光丁未屬縣新甯徭民雷再浩滋事鎮南出貲練勇廣設方略卒擒渠魁事平後城爲賊燬倡捐三百金以資修葺踰年秋復遇李沅發之變新甯復陷鎮南仍募勇千人會營進勦賊迎拒擊敗之擒斬三百餘名賊據城固守鎮南日夜分攻賊屢突圍皆爲勇截殺相持月餘賊窘迫待斃會鎮道兵至以勇不足特議用地雷火發城西南隅震圯鎮南率所部先登斬獲無算方搜捕首逆而官兵中與賊通者忽銃斃前鋒勁勇李逆得乘間竄廣西粵撫鄭某不能禦乃劾湖南將吏縱賊入境鎮南竟以是覲職自雷逆發難創爲團練修器械備糗糧所費

不貨官帑發需時輒籌貨佐之遂負累至數萬金家素裕以此中落會上官徐察其寃有以辨復爲言者素峒強恥以資緣干進遂決計歸郡人爭爲詩歌頌之新甯武岡各建祠以祀初鎮南履郡江忠烈公忠源以部民見與語奇之待以殊禮劉制軍長佑時肄業書院亦爲所獎拔二人皆籍隸新甯倡興團練首延江與定議卽令統領故俱執弟子禮其後粵事熾二人帥舊部轉戰千里卒以殊績勁節顯名天下

楊豫成字立之陵川人道光辛巳舉於鄉由大挑署江西安義知縣值歲祲平糶緩征民感實惠旋題補龍南地多盜懸格購捕獲著名賊百餘境內肅然奉檄分防贛南擊粵寇於觀音閣橫岡間有功以同知直隸州升用咸豐初補官甯都未及期卽調署贛州府值粵逆道九江南康竄入府境豫成

激勵士民授兵登陴用印徧鈐衣襟誓以死守賊來攻輒敗去守贛六年大小三百餘戰未嘗少挫時江西自會城以外九郡相繼淪陷獨贛城屹然無恙與南昌遙應爲閩廣屏蔽論功卽擢知府

賞戴花翎圍旣解復捐造礮船積穀六萬石以固江防濟軍食同治元年調署南安殘破之餘加意撫循流亡漸復百廢俱舉積前後功以道員留省補用遽以疾卒贛人祀入名宦所著有享帚集子長達侯補知縣

常恒昌字芸閣鳳臺人由翰林庶吉士歷授河南廣東道監察御史尋遷戶科給事中累居言職多所指陳極言州縣以遞解賠累消弭命案之弊以及聽訟贖貨枉法諸狀又言直省借易倉穀擾累滋弊名爲接濟民食實則朘削民財名爲

出陳易新實則挪新掩舊語皆切中時弊均奉

旨通飭施行一時想望丰采出爲雲南迤西道道漢回民爭利械鬪聚眾殺傷恒昌單騎馳諭繫其爲首者按問如律邊境肅然遷福建按察使旋投浙江布政使值海疆不靖定海再陷甯波諸郡相繼被兵餉軍練勇支應浩繁恒昌綜核得宜甚爲當事倚賴定海難民羣趨會城爲捐廉恤之民食半資湖米道梗艘不至乃預於軍餉中別儲米千餘石濟之心以定恒目前在閩已以籌防堵積勞致疾至是事益棘又與當事議和戰意不合大憤病增劇遂乞歸抵家尋卒所著有靜軒遺藁

栗燿字仲然渾源州人恭勤公次子也道光乙未舉順天鄉試以父恤蔭

特賜進士咸豐二年以知府揆發湖北在道奉

旨授漢陽府知府時漢陽再爲賊陷行省未復督撫皆就軍
次寄治耀至卽委綜營務明年從大軍復武漢未幾賊大至
總督不能軍城隨陷及節相官代爲督擊賊走之武昌旣復
旁郡賊亦棄城遁乃令耀留漢陽視府事前後積功以道員
用以廉幹爲巡撫胡文忠公所知釐稅糧臺多委令綜理奏
署荆宜施道尋加按察使銜補授武昌道荊州當蜀江下游
監司兼督鈔關時全楚軍餉仰資鹽榷又地當兵衝黔蜀寇
亂方殷督撫念非耀莫辦故仍令居署任耀綜核嚴密稅入
羨餘悉籍入公而修戰艦增軍屯水陸有備戰守皆宜歲辛
酉賊逼施南耀旣請重兵爲備復檄郡縣集民團守山險賊
合川匪分掠宣威諸郡施南協鎮某禦之遇覆盡沒全施大

震賴燿所請劉布政軍至與郡兵夾擊賊連敗之賊大創因竄歸蜀松滋人馬鉦者挾左道惑眾至數千人密通賊官軍擒斬鉦並其黨燿料賊未知鉦死希應援必復至力請大府集水陸軍密爲備賊果趣夔州遇官軍輒敗及得馬鉦死耗遂大潰水陸合勦俘斬萬餘自是無敢犯楚境庚申大淫雨荆江暴溢齧攻萬城隄聲若雷震水突起高於隄及尺荆人大恐燿督兵民備畚揭儲土石立泥淖閱躬視板築信宿隄上事定乃還在荆四年政教大行洎秋檄署臬篆旋奏攝漕司甫踰月授湖北按察使燿以父恭勤公曾任是職乃顏其堂曰誦芬感受殊遇思紹前烈日治文書綜財賦而征餉浩繁庫藏所出浮於入殆半殫心籌畫常傍徨通夕不寐猶以時接見僚屬詢民疾苦及興革事宜疾已深殊不自知同治

元年遽卒時有

旨擢湖北布政使矣聞既卒乃止燿性警敏遇事縝密周察而務存大體敦尚名義時時以利澤及人爲心尤勤於學淹通史傳及經世諸書兼工書畫嗜金石文時以自娛曰吾夙好此欲陶淑古人以鍼吾僻於政不無裨也世以雅度稱之趙逢年字硯農孟縣人由教諭保舉知縣道光甲午授肥鄉縣令見其民多佩短刀嚴禁之風遂息調署定興歷南皮年餘復任肥鄉逢時去時邑人相與懇留格於例至是則大喜結綵歡迎壺漿盈道復調玉田不以差務累民民歌頌之解組歸卒祀鄉賢

以上各府屬

祁宿藻字幼章壽陽人文端公弟也道光乙酉舉人戊戌成進士授職檢討出知湖北黃州府調武昌皆有惠政累遷廣

山西通志卷一百三十五 列傳第二十一
三十一
東按察使有軍功

文宗手書武昭七德四字以旌之咸豐三年授江甯布政使時
粵匪竄擾湖北總督陸奉

命赴九江防堵遇賊戰失利卽退回江甯盡撤沿江諸防賊
遂順流東下直逼會城江甯城周百三十里盡括諸營存兵
不敷守陣而藩庫存帑盡齎陸軍並部撥守城銀三十萬亦
爲所提解無遺宿藻惟以忠義激發士民謂富者不惜財貧
者不惜力則賊不難破也而承平旣久民懷倖心事難猝集
蘇撫某時留江甯乃與商急借織造及關稅鹽務各款爲守
禦具晝夜部署至廢寢食憤鬱成疾及賊至力起登陣躍望
樓諭弁兵以鎗礮及賊乃發於是發輒斃賊忽嘔血數升暈
絕仆地昇歸遂卒臨卒大呼以力不從心不能殺賊爲恨

十日城遂陷蘇撫先賊至去總督已被劾逮問旋戕於賊
上以宿藻盡瘁死事憫惜甚至

贈都察院右都御史謚文節蔭于世信知州同治四年總督
曾文正國藩奏請附祀江甯將軍祥厚祠以昭忠烈

特旨允之

傅乾元字健行壽陽人稟資警敏博極羣書領道光壬午鄉
薦由大挑歷署陝西洵陽咸陽洋縣清澗諸縣加同知銜借
補商州州同卒於官其在洵陽以地僻人不知學修復書院
延師課之洋縣歲賦耗羨幾及征額之半爲裁減存三之一
歲禮發倉賑之兩縣民皆感其惠及官商州駐龍駒寨寨距
州百里當水陸衝民健訟乾元摘發若神事至立決羣稱明
允一日聞鳴冤聲迹之無所覩日夕復然意必有奇冤莫伸

者訪之得寨民張某樵於山被戕其家以主名莫知又貧憚遠訟將斂瘞之蓋命案必先達州同知向不與聞也乾元立召役令緝凶役以舊例辭乾元曰官一也烏有聽民慘死而拘守陋規坐視者乎役畏責漫應之出東門行三十里見有敝衣曳屨往復山谷迷罔若失魄者心疑之執以至果卽殺張者一訊而服人稱神君焉家居時喜獎後進學行爲一時所推卒祀入忠義祠同時祀者有榮褒字子善乙未舉人居鄉以孝友聞由大挑知縣歷署隆平阜城所至興文教裁浮費循聲懋著借補藩庫大使未任卒

田雨公字敬堂孟縣人父生蕙以諸生循序貢太學隱居教授研究性理文行爲一時所宗稱純儒卒祀鄉賢雨公舉乙未鄉試戊戌成進士選庶吉士授編修甲辰分校會試尋充

河南鄉試正考官己酉再典江西試並稱得人兩遇大考皆
高等累遷至大理寺少卿大理於三法司主平反其後刑部
權重官此者率隨例畫諾不舉其職兩公遇讞必窮研詳究
間有糾駁

宣宗知其賢嘗

召對便殿嘉其亮直及

宣宗升遐議

配享禮引經據典與

遺詔相符士論稱之咸豐初上書論用人行政得失言多切
直

文宗爲動容時值軍興度支頗絀廷臣有加征稅間架議兩公
上書切諫議遂寢三年乞假歸里遂稱病不出歷主講平定

榆次及晉陽書院治經有法承其指受者後皆知名同治建元

詔起於家以親老固辭五年捻匪竄關陝奉

旨督辦山西團練與大吏商確機宜防守嚴密事平論功

賞三品頂戴居晉陽講席及二十年光緒中卒崇祀三立閣

子國俊由進士歷官貴州按察使

徐福麟字石甫忻州人家貧力學領道光丁酉鄉薦大挑知

縣咸豐中補鹽源地當蜀滇之交俗勁悍多劫盜福麟詰奸

緝暴有犯必懲良民獲安鄰郡土匪蜂起團丁堵禦擒其首

惡以功遷州同已而雲南叛回變作永北一帶土匪乘間

發擾及川境總督駱以福麟治鄉團有聲檄令相機迎剿

捷乘勝追入滇戰於永北之棉花地擒斬殆盡特奏

銜戴花翎以積勞致疾同治元年卒永北鹽源皆立廟以祀
徐繼畬字健男五臺人父潤第有傳繼畬幼岐嶷讀書穎悟
工屬文年未冠領鄉薦道光丙戌成進士

朝考第一選庶吉士丁外艱服闋授編修轉陝西道監察御
史前後上書皆關天下大計嘗奏言政體宜崇簡要所酌刪
部議裁抑吏權

上嘉納之因

召對與談時事至爲流涕繼畬受

宣宗知自此始丙申出爲廣西潯州知府數月擢福建延建邵
道庚子調署汀漳龍道時海疆多事敵艘聚廈門與漳州隔
一水居民日數驚繼畬相機堵禦境卒獲安督撫交章論薦
壬寅五月擢兩廣鹽運使旬日復遷廣東按察司癸卯擢福

建布政司丙午授廣西巡撫調福建令辦通商事務繼畚久
駐嶺表熟悉敵情得其要領莅任後端嚴持重務以恩信羈
縻體國家休息之意於時各國悅服咸遵約束部內瘡痍盡
復會英吉利使臣謀僦居烏石山伸入城之約閩人以督撫
不力拒羣譁然遂爲言官所劾先是繼畚入覲

宣宗詢以各國風土形勢奏對甚悉爰命採輯爲書書成曰瀛
環志畧未進呈而

宣宗升遐至是言者竟以是書爲口實

文宗召見畢語廷臣曰徐繼畚乃老實人並非欺詐一流內
太僕寺少卿會

詔求直言繼畚上三漸宜防疏一曰土木二曰宴安三曰
蔽疏入有

旨褒獎是歲王子科鄉試

特簡爲四川正考官數復大用矣適以閩撫任內起解犯官遲延被吏議免歸家居十餘年同治乙丑

詔以京卿來見派總理各國事務衙門行走旋補太僕寺卿加二品頂戴居三年以老疾致仕癸酉鄉試重宴鹿鳴蒙

恩晉頭品頂戴是歲卒年七十九繼畬之被議歸里也值粵匪北竄當事奏派督辦防堵其後回捻猖獗復奉督率官紳總辦各府州團防之

命駐太行年餘親歷各要隘所措置悉合機宜沈文定公桂芬時撫晉甚倚重之爲人器識深沈行政務持大體於通商事務尤老成遠慮洞達時勢忠愛出於天性自受知遇一念報國生死以之不解沽名罷官歸裝蕭然主講平遙書院以

自給父潤第故好陸王之學幼承其教而務為博覽記誦無遺所著瀛環志略及退密齋詩文並行於世初

宣宗既授繼畬粵西巡撫復

命鄭祖琛撫閩粵西地徧瘠獨撫臣以食溥梧關稅稱撫仕首相某素暱鄭乃於

上前盛稱繼畬才謂粵幸無事閩方通商宜兩易

上俞之鄭故佞佛既至粵日持齋戒殺專務姑息遂醜洪逆之亂流毒天下論者推原禍本恆追咎之而實基於首相之一言蓋峒蠻初無遠志當其蠢動之始一健吏足以制之云馮志沂字魯川幼補諸生甫冠舉道光乙未鄉試明年成進士授刑部主事歷遷郎中出為廬州知府擢徽甯池太廣道年五十四卒性警慧讀書過目成誦通籍後官京師二十年

與上元梅會亮平定張穆相師友皆傳其學尤深於詩筆下
名士徧與之交酬唱無虛日聲譽藉甚在刑曹能舉其職案
牘披覽一過輒不忘老胥滑吏莫能欺也雅以氣節自負不
能隨時俯仰咸豐初粵匪竄香市旬書乃普薦其知兵出佐
戎幕有所籌畫侃侃直陳屢失當道歎遇論功獎敘輒見損
夷然不屑也循資格授廬州知府招集流亡撫綏教養禮賢
課士謝絕饋遺深爲節相曾國藩所器重皖撫喬松年尤悉
其才奏調營務用薦擢監司權臬篆浸大用矣遽卒時論惜
之以前從軍勞績

盧光祿寺卿蔭一子入監讀書著有詩文集若干卷行世
張作彥字子羅崞縣人以舉人大挑授知縣補廣東吳川令
咸豐中署高明賊陷城復之斬其魁調陽春值旱荒發倉以

張旋署四會時髮逆大股竄粵土寇所在蠭起縣當兵衝城
卑惡甫興修而賊數千突至城中有兵二百設伏擊卻之賊
怒糾眾十餘萬來攻圍合文報斷絕土彥簡丁壯得千餘人
激以忠義誓死固守歷百餘日糧不足並括糠粃雜樹皮草
根食之與眾同甘苦城爲地雷轟數次裂百餘丈且戰且築
賊迄不得入益用呂公車雲梯火箭環攻穿地道十餘處皆
隨機應之間出奇礮其營擒斬甚眾始不敢近旣而食盡眾
心惶迫乃遣子蓬瀛乘雨夜縋而出泗水穿賊營至省告急
省中方知四會之尙存益發兵往援圍乃解調電白擊陳金
剛退之金剛久踞信宜窺高州府大府傲作彥往卽宰茂名
賊習知四會事不敢犯尋自相誅滅信宜遂復補瓊防同知
調黃岡遷知雷州府歷韶州府所至興文教決疑獄士民感

戴茂名四會俱建祠以祀薦擢道員用以老辭歸光緒中卒
著有四會守城紀略嶺南從公遺錄等書子登瀛官翰林院
侍讀視學貴州有聲值丁戊晉大饑所得廉俸悉數助賑差
竣貧不能辦裝留主貴陽書院講席期年乃資以歸尋遭父
憂服闋以疾卒於家

喬晉芳字春皋一字心農聞喜人少爲諸生有聲事母及嗣
母敬養備至學務實踐以程朱爲歸而以其暇工詩辭善行
楷道光十五年以一甲三名及第故事一甲三人號曰鼎甲
晉士自順治來至晉芳始躋茲選而慮之泊如也散館改刑
部充軍機領班章京值軍書旁午卯入酉出勤瘁無懈典試
湖南所取皆知名士以京察高等出守湖南常德政以正民
風端士習除衙蠹爲要嚴禁扶乩問卜訪擒金牛山賊衆民

以安堵書院久弛力爲延名宿設膏火以贍之沅湘故多秀
士至是益蒸蒸矣會被水災捐立育嬰堂同善局並設廠濟
災民城隍潰決親督工修之並於陽泗廟等處築石堰以當
水衝湖撫駱文忠公秉章深知其才調守長沙時粵氛偪近
守待甫備賊大股已肉薄南門外晝夜轟擊礮子雨落而守
陣兵單外援未至晉芳晝夜捐循目不交睫賊爲地雷轟城
傾塌者再蜂擁攀堞晉芳爲木柵囊土而實之卒不能入又
募勇士縋城斫其營厯八十餘日賊智窮而退事聞

賞戴花翎署糧儲道篆晉芳以兵燹之後瘡痍未復申請停
運緩徵吏由是不得緣爲奸久之積勞成疾乞歸晉中大吏
延請主河東書院講席因疾未至平生自奉儉約而性好施
子道光丙午邑大饑饑捐千金周濟貧乏賴以全活者甚衆

咸豐中卒崇祀鄉賢

劉煦字曉伯趙城人父體重由舉人歷知廣信府兵備河北所在有惠政擢江西按察使進湖北布政使引疾歸卒煦少補諸生道光丁酉以拔貢朝考優等擢知縣樸誠廉敏明習吏事官畿輔甚有治聲累遷至大順廣道同治初捻逆蓄謀北犯山東土匪教匪遙起畿南震恐煦督所部治鄉團築寨堡堵禦有方賊至輒受懲相戒無犯三郡之民倚爲長城以積勞卒於官士民爲立祠以祀喪歸羸糧而從者數百人爭昇其柩抵家哭奠而去祁文端公疏請表章循吏首舉焉

詔國史館檄取事實立傳

以上各州屬

右道光年十六人

又三人附見

吳秀字麗堂襄陵人由武生入營歷官陝西甯羌營守備咸

豐二年粵匪擾長沙秀奉調帶兵援剿從大軍力戰江淮間以功累擢至貴州清江協副將記名總兵賞加提督銜同治元年統領陝甘川湖宣化各營兵進軍淮北遇賊靈璧之任家廟奮前搏戰賊敗走秀輕騎窮追遇伏後軍不繼伏兵齊起賊反圍之數重秀左右衝突被重傷與長子國榮千總梁德親兵百餘人同時戰沒秀治軍整肅所至秋毫無擾淮人素德之聞其死無不失聲隕涕事聞

論祭葬予謚壯愨入祀昭忠祠世襲騎都尉兼一雲騎尉並於殉節地方建立專祠

董思源字星海洪洞人咸豐間歲貢生沈默謙謹敦篤內行居鄉尤多義舉濱汾有通利渠引水溉臨洪趙三邑田四百餘頃後以橋圯水壅皆成旱阜集邑人倡修之灌溉如故城

南澗水漲隄決壞民田數百畝捐千金修葺之鄰村以爭田賦聚眾械鬪將成大獄思源往理論之並貸錢以均其利事遂寢癸丑丁卯再罹寇亂邑人殉難者甚眾曰此人心風俗所關不可聽其湮沒也時次子文渙以檢討充講官得言事令上之蒙

旌恤如例忠義節孝二祠將圯至是並葺之特擴其制以壯觀焉周恤三黨藉爲依毗者常數十家所居村歲徵額賦皆先期爲墊辦村人不知催科之擾者歷數十年軍興以輸餉議敘主事同治元年

詔舉孝廉方正縣人以其名應一時大吏多悉其行義殷勤勸駕思源淡於仕進入都不與試又九年卒祀鄉賢以上各府屬胡韞輝字石齋壽陽人性至孝父沒於塞北徒步衝寒收骸

骨歸葬家貧力學舉咸豐己未鄉試由大挑署廣西武緣知縣鋤姦除暴卓著治聲光緒初田州土司岑氏搆亂梧州府徐討平之尋議改流以韞輝裕贍略請於上官檄攝州事陽萬土司岑潤青者懷反側不利改流謀奪故地憚韞輝名遣其黨乘間行刺韞輝覺搜獲之詢知潤青所使叱之曰歸語爾主吾奉命治此豈汝鼠輩所能賊耶賊而遣之時知府方以事旋省留兵勇數百卽日夕部勒嚴爲備未幾岑氏別部復起他守官多竄匿韞輝設伏待之賊至奮前力戰破其眾乘勝盡復所陷地徐以計擒渠魁並其黨誘殲之事平保奏以州同知用尋補隆安縣益加意拊循民稱生佛甫六月以積勞成疾嘔血卒祀忠義祠

余承恩靈石人以縣丞需次直隸軍興練勇擊賊數有功

擢知府加道銜同治初畿南土賊屢起降匪張錫珠糾合山東幅教各匪衆至數萬督勇鏖戰多所斬獲會賊擾威縣大順廣道秦聚奎迎剿敗沒賊益熾當事奏以承恩署大名府督所部擊賊冀州敗之連戰曲周擒其首逆餘黨潰走未幾宋景詩叛總督劉駐軍衡水以畿南防務委之方遭憂秦留任屢敗賊於臨漳及僧邸兵至合剿於臨洛遂殲其衆景詩僅以身免賊平乞回籍守制許之四年五月擒首張總愚北竄

詔迅速赴直招勇成軍明年梟匪起掠近畿賊騎飄忽倏東倏西官軍困於奔馳累月不得一戰總督獲譴去承恩奉嚴旨限一月平賊乃備銳技勁騎專事鵬剿嘗一夜馳二百里至海豐掩擊大破之餘黨西竄邀之於趙州又破之殲戮

殆盡已而張總愚由秦入晉奉

命越境合剿未行賊擾及豫復令赴河朔迎剿甫行而賊已
竄至保定畿輔大震承恩方駐高陽以夜半疾馳抵省衆心
始定時七年正月也自是常爲游擊之師兼顧省防津防捻
逆蕩平

優賚有加承恩魁岸多力痘癍著面在軍與士卒同勞苦人
衆盡死所部勇爲一時冠大河以北無不知余麻子軍者假
歸時

特旨以其剿賊奮勇道員簡用未盡其所長令服闋以總兵
用又

諭以朝廷文武並重因材器使意俾奮勉立功其後朝臣有
言軍營體製武職遠出文員下者乃復賞還道員加二品銜

云州以上各

右咸豐年四人

山西通志卷一百三十五

山西通志卷一百三十五

鄉賢錄二十

學